

# Phawuloosi Piliphphisiyoosa Asaw Xaafeedda Kiitaa Geluwaa

Phawuloosi Piliphphisiyoosa asaw xaafeedda kiitay xaafetteeddawe, Maqidooniya gidduwan de7iyaa Roomen omoddetteedda Piliphphisiyoosa geetettiya gadiyaan de7iyaa ammaniyaawantussa. Hawantu Phawuloosi koyro ammanthiide shiishsheeddawantta. Unttunttu Roome gade yeleta gido dirawunne qassikka kare gadeppe yeedda wogaaninne ammanuwan daroppe ayyiino. Phawuloosa bollan unnttunttu daroppe hanqqtteedda gaasuukka hawaa (Kit 16:20). Ha kiitay xaafetteeddawe, hara ammaniya oosanchchatuu Phawuloosa qofaa phalqqi phalqqiide waayissiyaa wodiyaananne Piliphphisiyoosa ammaniyaawantu giddon denddeedda worddo timirttiya gaasuwan A wozanay daro kayyottiide me77eedda wodenne qasho golliyaan I de7iyaa wodiyaana. Gidoshshin, Phawuloosi Yesuusi Kiristtoosa minissiide ammaniya asaa gideedda diraw, ha kiitaa bollan qoncciide beettiyaawe nashechchaanne kumentha ammanettiyaawaa.

Phawuloosi ha kiitaa xaafeedda koyro gaasu A metuwaa wode A maaddanaw Piliphphisiyoosa ammaniya asay imotaa aw kiitteedda diraw, untuntta galatanaassa. A bollankka untunttu bollankka dumma dumma metuu gakkeeddawaa

gidooppekka, unttunttu xalana malanne kumentha ammanettiide de7ana mala, ha gaketteedda injjiyan unttuntta menthethee. Ayyuwaanne otoruwaa diggiide, Yesuusi Kiristtoosa ashikketethan unttunttu kumana mala, minissiide unttuntta hassayisseeda. Yesuusi Kiristtoosanna ittippe gideeddawaan unttunttu demmeedda de7uu Xoossaa aadho keekatethaappe pulteeddawaanne unttunttu ammanuwan akkeeddawaa gidiyaawaappe attin, Ayihudatuwaa wogatuwaa poliyaawan beetteeddawaa gidennawaa unttuntta hassayissee. Yesuusi Kiristtoosanna ittuwaa gidiide de7iyaa ubbatoo Xoossay immiyyaa sarotethaabaanne nashechchaabaa unttunttussi xaafee.

Ha kiitay erettiyaawe nashechchaa, ammanettiyaawaa, ittippetethaanne Kiristtinnaa ammanuwaaninne de7uwan minniide de7iyaawaa geeshshiide bessiyaawaana. Hewaa bollakka gujjiide, Phawuloosi Piliphphisiyoosan de7iyaa ammaniyyaa asatuwaa siiqiyyaa wolqqaama siiquwaa qonccissee.

### **Shemppatuwaa Ubbatuwaassi Imetteedda Qantha Qofatuwaa**

Geluwaa (1:1-11)

Phawuloosassi de7eedda de7uwaa hanotaa (1:12-26)

Kiristtinnaa de7uwaa leemisuwaa (1:27-2:18)

Ximootaosassinne Ephafiroodiiituussassi de7iyaa qofaa (2:19-30)

Ammanuwaa eqettiyaawanttuppe naagettana mala odetteeddawaa (3:1-4:9)

Phawuloosi Piliphphisiyoosa ammaniyyaawant-

tussi shiishsheedda galataanne maqquwaa  
 (4:10-20)  
 Wurssethaa qutiyaa (4:21-23)

### *Sarotaa*

<sup>1</sup> Nuuni Yesuusi Kiristtoosa oosanchchatuu Phawuloosinne Ximootoosi, Kiristtoosa Yesuusan de7iyaawanttoo, Piliphphisiyoosa giya katamaan de7iya geeshshatoo ubbatoo, ammaniyaawantta kaalethiyaawanttoonne maaddiyaawanttoo ha dabidaabbiyaa xaafeetto.

<sup>2</sup> Nu Aawuwaa Xoossaappenne Godaa Yesuusi Kiristtoosappe aadho keekatethayinne sarotethay hinttenttoo gido.

### *Phawuloosi Woosseedda Galataa Woosaa*

<sup>3</sup> Taani hinttena hassayiya wode ubbaan ta Xoossaa galatay.

<sup>4-5</sup> Hintte koyiro gallassaappe hanno gakkanaw, mishiraachchuwaa qaala odiyaawaan taana maaddeedda diraw, taani ubba wode hinttenttoo ubbaw nashechchan Xoossaa woossay.

<sup>6</sup> Qassi hinttenttu giddon lo77o oosuwaa doom-meedda Xoossay, Kiristtoosi Yesuusi simmiyaa gallassay gakkanaw polanawaa eray.

<sup>7</sup> Taani hinttenttoo ubbaw hewaadan qoppanaw bessee; ayissi gooppe, taani hinttena ubba wode hassayay. Ha77i taani qashuwan de7iyaawaaninne wonggalaw mootettiyaawan, qassi wonggalaa minissa essiyaawaaninne, Xoossay taw qaadeedda qaadaa hinttekka taananna gishi akkeedita.

**8** Ayissi gooppe, taani hinttena ubbatuwaa Kiristtoosi Yesuusappe yiaya siiquwan ay keenaa siiqintto, Xoossay taw markka.

**9-10** Qassi taani hinttenttoo Xoossaa woossiyaawe hawaa; lo77obaa ayaanneekka dooranaw hinttenttu danddayanaadaaninne, qassi hinttenttu siiquu tumu eratethaananne akeeka ubbaanna ittippe gujji gujji diccanaadan, Xoossaa woossay; yaatiide Kiristtoosi simmiyaa gallasan hinttenttu suurenne pokkuu baynnawantta gidana.

**11** Qassi hinttenttu shemppuukka Xoossaa bonchchoonne galataw Yesuusi Kiristtoosa bagganna beettiya xillotethaa ayifiyaayifana.

### *Phawuloosi Qashuu Wonggalay Aakkanawaa Diggibeenna*

**12** Taanaadan Xoossaa kaalliyawantto, ha taana gakkeeddawe mishiraachchuwaa qaalay aakkanaadan tumu maaddeeddawaa hinttenttu erana mala koyyay.

**13** Taani Kiristtoosa diraw qashetteeddawaa, kaatiyaa golliyaa naagiyaa ubbatuunne hawaan de7iya haratuu ubbatuu eriino.

**14** Qassi taani qashetteeddawe nu ishatuwaappe dariyaawaanttu Godan loythi ammanettiide, Xoossaa qaalaa yashshi baynnaan kasewaappe xaliide odanaadan maaddeedda.

**15** Tumuppe ituu ituu qanaatiyaa dirawunne palumiyyaa diraw, Kiristtoosawaa odiino; shin haranttu lo77o amuwan odiino.

**16** Hawantu Xoossay taw wonggalaa naagiyaa oosuwaa immeedda diraw, siiqiide qaalaa odiino.

<sup>17</sup> Shin yokkonttu taani qashuwan de7ishshin, ta bolla waayyiya ahanawaa untunttoo malatina, barena siiqiyaa wolqqaama amuwan Kiristtoosawaa odinoppe attin, wozanaappe odikkino.

<sup>18</sup> Aynne baawa; malatissiyyaa odonne gido woy tumu odonne gido, ay ogiyaaninne Kiristtoosawaa odooppe, taani hewan nashettay. Sinthanawukka qassi taani nashettana.

<sup>19</sup> Ayissi gooppe, taani hinttenttu woosaaninne Yesuusi Kiristtoosa Ayyaanaappe yiaya maaduwan attanawaa eray.

<sup>20</sup> Ta wolqqaama amuunne Xoossaappe akkana gaade taani nashechchan naagiyaa naaguu aye gooppe, taani paxa de7inakka woy hayiqqinakka yayyennaan, kasewaadan ha77ikka ta kumentha asatethan Kiristtoosi bonchchettanawaappe attin, taani haray atto ittibankka yeellatennaan attanaassa.

<sup>21</sup> Ayissi gooppe, taw de7uu Kiristtoosa; qassi hayiquukka taw go77a.

<sup>22</sup> Shin taani paxa de7iyaawaan daro go77iyaawaa oothanawaa gidooppe, haqawaa dooranentto taw erettenna.

<sup>23</sup> Taani ha laa77u yewatuwan meetootay; ha de7uwaappe shaakettanawunne qassi Kiristtoosanna ittippe de7anaw amottay; Kiristtoosanna ittippe de7iyaawe ubbaappe aadhdheedda daro lo77obaa.

<sup>24</sup> Shin taani hayiqqiyawaappa hinttenttu diraw paxa de7iyaawe hinttena daro koshshiyaawaa.

<sup>25</sup> Hawe tuma gidiyaawaa taani geeshshaade

eray; qassi ammanuwan hinttenttu diccanaadaaninne nashettanaadan, taani hinttenanna ubbaanna paxa de7ana.

<sup>26</sup> Hewaa diraw, taani hinttenanna laa7ethuwaa yiaya wode, Kiristtoosa Yesuusanna hintte de7iya de7uwan, tabaan ceeqettiyaabay hinttenttoo darana.

<sup>27</sup> Gidooppekka, hinttenttu hinttenttu huuphew Kiristtoosa wonggalaw bessiyaa de7uwa de7ite; taani hinttena baade woy be7ana dhayina, hinttenttu itti qofaan minniide eqqeeddawaanne, qassi wonggalaa ammanoo itti wozanaa gidiide ittippe baaxetiyaawaa sisana.

<sup>28</sup> Hintte morkketuwassi ayankka yayyoppite; hewe unttunttoo unttunttu dhishissee; shin Xoossay hinttena xoonissiyaa diraw, hinttenttoo atotethaa dhishissee.

<sup>29</sup> Ayissi gooppe, Kiristtoosaw oothiyaa qaaday hinttena gakkeeddawe hinttenttu aani ammanana xalalaassa gidennaan A diraw waayyiyaakka akkanaassa.

<sup>30</sup> Taani kase baaxetishshin hinttenttu be7eeddawaa mala baaxiinne qassi ha77ikka taani baaxetiyaawaa hinttenttu sisiyaawaa malay hinttena gakkeedda.

## 2

*Kiristtoosi      Barena      Kawushsheeddawaa  
Leemisuwaa*

<sup>1</sup> Kiristtoosan hinttenttu de7iyaa de7uu hinttena wozanthii? A siiquu hinttena menthethii? Geeshsha Ayyaananna hinttenttoo ittippetethay de7ii? Hintte ittuu ittuwassi keekitennee qaretti-itee?

<sup>2</sup> Yaatooppe, hinttenttu qofaan, siiquwan, wozanaaninne qofaa poluwan ittuwaa gidiide, taana polo nashechchite.

<sup>3</sup> Hinttena siiqiyawaan woy ceeqettanaw koyyiya mela amuwan ittibaanne oothoppite; shin ituu ittuwaappe dhoqqay yaagiide qoppennaan, ituu ittuwassi hinttenttu huuphiyaa kawushshite.

<sup>4</sup> Qassi ituu ittuwaa go77iyaawaa koyyanaappe attin, hinttenttu huuphe xalalaa go77iyaawaa koyyoppite.

<sup>5</sup> Kiristtoosa Yesuusan de7iya ha ashikketethaa qofay qassi hinttenankka de7anaw bessee.

<sup>6</sup> I ubba wode Xoossaan gidiide de7eedda; shin I wolqqaan Xoossaan keena gidiya maatay de7iyaawaa bessiyaawaadan paydibeenna.

<sup>7</sup> Shin I bare sheniyaan ubbabaa aggiide, \*  
aylliya medhetaa akkeedda;  
qassi asaa malatiide qoncceedda.

<sup>8</sup> I barena kawushsheedda;  
hayqoo, ubba haray atto,  
masqqaliya bolla hayqqanawukka azazetteedda.

<sup>9</sup> Hewaa diraw, Xoossay A loythi dhoqqu dhoqqu  
ootheedda;  
qassi sunthaa ubbaappekka aadhdhiyaa  
dhoqqa sunthaa aw immeedda.

<sup>10</sup> Hewaa diraw, saluwaaninne sa7an  
sa7aappe garssan de7iya ubbay  
Yesuusa sunthaa bonchchanaw gulbbatana.

\* <sup>2:7 ubbabaa aggiide:</sup> I barena mela udeedda guussaa.      **2:10**  
Isa 45:23

**11** Qassi asay ubbay Yesuusi Kiristtoosi Godaa yaagiide,  
Xoossaa Aawuwaa bonchchoo markkattana.

*Ha Sa7an De7iya Asaassi Poo7o Gidiyaawaa*

**12** Hewaa diraw, ta dabbatoo, taani hinttenanna de7iyaa wode ubbaan hinttenttu taw azazetteed-dawaadan, ha77i taani hinttenttu matan de7enna wodekka, hinttenttu kasewaappe aathiide taw azazettanaw bessee; yashshatethaaninne kokkorssaan hinttenttu atotethaa polanaw oothite.

**13** Ayissi gooppe, Xoossay hinttena barew eeno giissanaadaaninne qassi I qoppeeddawaa hinttenttu oothanaadan hinttenttu giddon ubba wode oothee.

**14-15** Geellanne nagaranchcha asaa giddon pokkuu baynnawantta, geeshshatuwaa, Xoossaa naanatuwaadankka pokkuu bayinnawantta gidite; qassi zuuzummennan woy iitabaa qoppennaan ubbabaa oothite. He asaa giddonikka saluwan poo7iya xoolinttiyaadan poo7iidde,

**16** de7uwaa mishiraachchuwaa qaalaa unttunttoo odite; he wode ta daaburayinne ta oosuu mela dhayibeennawe erettiyaan diraw, Kiristtoosi sim-miyaa gallassi taani hinttenan ceeqettana.

**17** Haray atto hinttenttu ammanuu Xoossaw yarshshiyaa yarshshuwaa bolla ta suuthay ushshaa yarshshuwaadan gukkooppekka, taani nashettay; hinttenanna ubbaanna ittippe nashettay.

**18** Hewaadan hinttekka qassi nashettanaw bessee; taananna ittippe nashettite.

*Ximootoosinne Eppafiroditoosi Ootheeda  
Oosuwaan*

<sup>19</sup> Shin taani hinttenttu de7uwaabaa sisaade nashettanaadan, Ximootoosa hinttekko ellekka yeddanawaa Godaa Yesusan ammanettay.

<sup>20</sup> Ayissi gooppe, hinttenttu de7uwaabaw wozanaappe hirrgiyaa A mala asay haray ooninne taw baawa.

<sup>21</sup> Ayissi gooppe, haratuu ubbatuu barenttu hu-uphe go77aa koyyiino; Yesuusi Kiristtoosawaa koyyikkino.

<sup>22</sup> Shin na7ay bare aabbu oothiyaawaadan, Ximootoosi taananna ittippe gidiide, wonggalaan oosuwaan ootheeddawan, ammanettiya asaa gidiyaawaa erisseeddawaa hinttenttu eriita.

<sup>23</sup> Hewaa diraw, taani yewuu haniyaawaa be7aade, elekka A hinttekko yeddana gaade qoppay.

<sup>24</sup> Taani ta huuphew mata wodiyaa hinttekko baanawaa Godan ammanettay.

<sup>25</sup> Shin taani ta ishaa Eppafiroditoosa, taananna ittippe ta bagga gidiide ootheeddawaa, oletteed-daawaanne, qassi taana maaddiyaawan hinttenttoo kiitttiide ootheeddawaa hinttekko kiittanaw koshshiyaawaa qoppaaddi.

<sup>26</sup> Ayissi gooppe, I hinttena ubbaa be7anaw laamotee; qassi I saketteeddawaa hinttenttu siseedda diraw, bare wozanaan daro metootee.

<sup>27</sup> I tumu sakettiide, hayiqqi atteeedda; shin Xoossay aw qaretteedda; A xalalaw gidennaan kayyuu kayyuwaa bolla gujettenaadan, tawukka qaretteedda.

<sup>28</sup> Simmi hinttenttu laa7enthuwaa A be7iide nashettanaadan, tawukka ta wozanaa kayyuu

irxxanaadan, taani ellekka A hinttekko yeddana.

<sup>29</sup> Hewaa diraw, Godan de7iya ishaadan, kumentha nashechchan A mokkite; qassi A malatiyaa asaa ubbaakka bonchchite.

<sup>30</sup> Ayissi gooppe, hinttenttu hinttenttu huuphew taana maaddana danddayenna maaduwaa maad-danaw, Kiristtoosa oosuwaa diraw, bare shemp-puwaa shenekoo giide, hayiqqi ateedda.

### 3

#### *Tumu Xillotethaa*

<sup>1</sup> Wurssethaan, taanaadan Xoossa kaalliyawantto, Goday hinttenttoo nashechchaa immo. Taani kase xafeeddawaa zaarethaade xaafiyaaawe taana waayissenna; qassi he xaafiyaaawe hinttena naagana.

<sup>2</sup> Iitabaa oothiyaawanttuppe, he kanatuwaa eeshshay de7iyaawanttuppe, qaxxaray koshshee giya asatuwaappe naagetite.

<sup>3</sup> Ayissi gooppe, nuuni Xoossa Geeshsha Ayyaan Xoossaw goyinniyaa dirawunne nu de7uwan Godaa Kiristtoosa Yesuusan nashettiyaan diraw, tumu qaxxaraa qaxxaretteeddawanta; asatethaa bolla oosettiyaawan ammanokko.

<sup>4</sup> Qassi taw ta huuphiyankka ta asatethan ammanettiyaawe de7ee. Ay asaynne bare asatethan ammanettiyaawe barew de7ee giide qoppooppe, taani aappe loytha aadhdyay.

<sup>5</sup> Taani yelettoodeppe hosppuntha gallasaan \* qaxxarettaddi. Taani yeletan Israa7eeliyaa;

---

\* <sup>3:5</sup> *Taani yelettoodeppe hosppuntha gallasaan:* Hawe Ayi-hudiyya attuma naanay yelettoodeppe hosppuntha gallasaan qaxxarettiyaawaa bessee.

Biiniyaama zare; walakay bayinna Ayihuda asaa. Ayihuda higgiyaa naagiyaaawan gidooppe, taani Parisaawe;

<sup>6</sup> Ayihuda ammanoo seelaa gidooppe, taani ammanniyaawantta waayissaaddi; itti uray Muse higgew azazettiide xilliyaawaa baggaa gidooppe, taanan pokkobay beettibeenna.

<sup>7</sup> Shin taana go77iyaa he ubbabaa Kiristtoosa diraw bayeeddawaadan payday.

<sup>8-9</sup> Tumakka, hewanttu xalalaan gidenna; taani ta Godaa Kiristtoosi Yesuusa eriyaawe ubbabaaappe loythi aadhdiyaa diraw, ubbabaa taana mulekka go77ennawaadan payday; taani A diraw ubbabaa yegga bashaaddi. Kiristtoosa demmanawunne aananna de7anaw ubbabaa wora oleeddawaadan payday; taani Muse higgew azazettaade demmiyaa ta huuphe xillotethay taw baawa. Kiristtoosa ammanina, Xoossay immiya xillotethay, ammanuwan Xoossa matappe yiyyaa xillotethay taw ha77i de7ee.

<sup>10-11</sup> Taani Kiristtoosanne A dendduwaa wolqqaa eranaw koyyay; yaataade taani ta huuphew hayiquwaappe denddana yaagiyaaawan, A waayyiyyaa aananna waayyettanawunne A hayquwan A malatanaw amottay.

### *Gakkiyaasaa Gakkanaw Woxxiyaawaa*

<sup>12</sup> Taani ha77i demma diggaaddi woy taanan bali baawa giikke. Shin Kiristtoosi Yesuusi taana barew ootheedda woytaa demmana gaade elleel-lay.

<sup>13</sup> Taanaadan Xoossa kaalliyaaawantto, taani hewaa demma diggaaddi gaade qoppikke; shin taani ittibaa oothay; taappe guyyenna

de7iyaawaa dogaade sinthan de7iyaawaa oyqqanaw wadhettay.

<sup>14</sup> Xoossay Kiristtoosi Yesuusa bagganna bolla de7uwassi xeesiyaa woytaa akkanaw, ta gakkanaw woxay.

<sup>15</sup> Simmi nuuni Ayyaanan minneeddawantu ubbatuu hawaa qoppanaw bessee; qassi hintteppe amareeddawanttoo ayaaninne dumma qofay de7ooppe, hewaakka Xoossay hinttenttoo qonccissana.

<sup>16</sup> Gidooppekka, nuuni hanno gakkanaw de7eedda maaraadan, ane sinthaw he maaraa kaalloytte.

<sup>17</sup> Taanaadan Xoossa kaalliyawantto, taani haniyaawaadan hanite. Nuuni hinttenttoo leemisuwa gideeddo; hewaadan hinttekka nuuni hinttenttoo leemisuwa gideedda maaraa kaalliyawantta akeekite.

<sup>18</sup> Ayissi gooppe, taani hewaa hinttenttoo kase coratoo odaaddi; qassi ha77i laa7ethuwaakka afoxxaadde hinttenttoo oday; Kiristtoosi masqqaliyaa bolla misimaariyan dhishettiide hayiqqeeddawoo barenttu shemppuu barena morkke ootheedda daro asatuu de7iino.

<sup>19</sup> Unttunttu wurssethay bashshaa; unttunttu uluu unttunttoo Xoossa; yeellatanaw bessiyaawan unttunttu otorettiino; qassi ha sa7aabaa xalalaa qoppiino.

<sup>20</sup> Ayissi gooppe, nu biittay saluwaana; nuuni qassi saluwaappe yaana nuuna ashshiya Godaa Yesuusi Kiristtoosa naageetto.

<sup>21</sup> Kiristtoosi ubbabaa bareppe garssan wothanaw danddayiyyaa bare wolqjan, nu

daaburanchcha asatethaa laammiide, bare  
bonchcho asatethaa malatissiide oothana.

## 4

### *Wurssetha Zoriyaa*

<sup>1</sup> Taanaadan Xoossaas kaalliyaaawanttoo, taani siiqiyaaawanttoo, laamotiyaaawanttoo, taana nashechchiyawaaanttoo, taana dhoqqu oothiyaawanttoo, ta dabbatoo, simmi Godan hinttenttu minni eqqanaw bessee.

<sup>2</sup> Ewoodenne Sinxxiikee, hinttenttu laa77uukka qofaan ittuwaa gidiide, Godan de7anaadan, taani hinttena zoray.

<sup>3</sup> Qassi taananna oothiyaa ammanetteeddawoo, neeni ha macca asatuwaa maaddanaadan, taani neena woossay; ayissi gooppe, unttunttu taanananne unttunttu sunthay Xoossaas de7uwaa max-aafan \* xaafetteedda Qaleminxxosanna qassi taananna ittippe oothiyaa haratuwaa ubbaanna wonggalaa ubbasaa gathanaw daabureeddino.

<sup>4</sup> Godaanna hinttenttu de7iya de7uwan ubba wode nashettite; taani hawaa gujjaadekka gay; nashettite.

<sup>5</sup> Asay ubbay hinttenttu ashikketethaa ero; Goday matan yaana.

<sup>6</sup> Xoossaas hinttenttu woossiyaa woosaa ubbaan A loythi galatiidde, hinttena koshshiyaawaa ubbaw woossiteppe attin, ittibawukka hirggoppite.

---

\* **4:3 Xoossaas de7uwaa maxaafan:** Xoossaas asaa sunthay xaafetiyyaa maxaafaa.

**7** Qassi asaa eratethaa ubbaappe aadhdhiyaa Xoossaar sarotethay hinttenttu wozanaanne hinttenttu qofaa Godaa Yesuusi Kiristtoosa bagganna naagana.

**8** Wurssethaan, taanaadan Xoossaar kaalliyawantto, hinttenttu wozanaan lo77obaanne galatissiyaawaa qoppite; tuma gidiyaabaa ubbaa, bonchchissiyaawaa ubbaa, bayizzuwaa gidennabaa ubbaa, geeshshabaa ubbaa, siiquwaa ubbaa, suure gidiyaabaa ubbaa qoppite.

**9** Hinttenttu taappe tamaareeddawaa, akkeeddawaa, siseeddawaanne be7eeddawaa ubbaa oothite; qassi nuussi sarotethaa immiya Xoossay hinttenanna ittippe gidanawa.

### *Barew Kiitetteedda Imotaw Phawuloosi Galateeddwaa*

**10** Shin daro wodiyaappe guyyiyan, ha77i hinttenttu tawaa laa7enthuwaa qoppanaw doomeedda diraw, taani Godan loytha nashettay; taw qoppanaw hinttenttoo injetennan ixseeddawaappe attin, taw qofaa qoppiita.

**11** Taani hawaa taana meteedda diraw giikke; ayissi gooppe, taw de7iyaabay taw gidana <sup>†</sup> giyaawaa taani tamaaraaddi.

**12** Taani metootiide wooti de7anentto eray; qassi durettiide de7iyaawekka ayentto eray; haqan gidinakka awude gidinakka, taani kaluwaanne koshshaa qassi pacaanne palahaan tamaaraaddi.

---

<sup>†</sup> **4:11 taw de7iyaabay taw gidana:** Taw de7iyaabaan taani shempay, kallay, woppugay.

**13** Kiristtoosi taw immeedda wolqqan, ubbabaa oothanaw taani danddayay.

**14** Gidooppekka, hinttenttu ta metuwaa taananna metootiide daro loytheeddita;

**15** Piliphphisiyoosa asaw, wonggalaa mishi-raachchuu koyro hintte giddon odetteedda; shin taani Maqidooniyaappe keseedda wode, taana ammaniyyaa hinttenttuppe attin, haray maad-dibeennawaa hinttenttu hinttenttu huuphew eri-ita; qassi immiyaabankka akkiyabankka hint-teppe attin, haray taana maaddibeenna.

**16** Ayissi gooppe, taana metuu oyqqeedda wode, haray atto taani Teselonqqiyaan de7ishshinkka taana zaari zaariide maaddeedda.

**17** Taani hinttewaa bolla harabay gujettanawaa koyyiyaawaappe attin, woyitaa xalalaa akkanaw koyyikke.

**18** Shin taani hinttenttu immeedawaa ubbaa akkaaddi; qassi taw palahiide gidiyaawe de7ee. Hintte kiitteedda ubbabaa Eppafiroditoosappe akkaaddi; koshshiyaa ubbay taw de7ee. Hintte taw kiitteedda imu Xoossaw sawuwaa toshikku giyaanne I dosiyaa, A nashechchiyaa yarshshuwaa mala.

**19** Qassi ta Xoossay bare bonchcho duretethaa daruwan Kiristtoosi Yesuusa bagganna hinttena koshshiyawaawaa ubbaa hinttenttoo immana.

**20** Nu Xoossaw, nu Aawoo medhinaappe medhi-naa gakkanaw bonchchuu gido. Amen77i.

### *Wurssetha Sarotaa*

**21** Kiristtoosi Yesuusawaa gidiyaa Xoossaa asatuwaa ubbatuwaa saro giite. Taananna hawaan de7iya ishatuu hinttena saro giino.

**22** Hawaan de7iya Xoossaa asatuwaa ubbatuu, ubbaappekka aathiide Kaatiyaa Qeesaare golliyaan de7iyaawanttu hinttena saro giino.

**23** Nu Godaa Yesuusi Kiristtoosa aadho keekatethay hinttenanna gido.

**Ooratha Caaquwaa  
New Testament in Dawro (ET:dwr:Dawro)**

copyright © 2011 The Word for the World

Language: Dawro

Translation by: Wycliffe Bible Translators, Inc.

Contributor: The Word for the World Ethiopia

**Dawro New Testament**

The Word for the World International

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-12-29

---

PDF generated using Haiola and XeLaTeX on 26 Jul 2025 from source files dated 29 Jan 2022

5b570ff5-a6e8-534a-b573-14968b5f3d71